

**BAI JENDAURREKO IKUSKIZUNAK, BAI JOLAS JARDUERAK ETA
BAI –JENDAURREKO IKUSKIZUNAK, HERRIKO JAIK EDU
BESTELAKO KULTUR EKITALDIK DIRELA BIDE – INSTALAZIO
EDO EGITURA BEHIN-BEHINEKOETAN, ERAMANGARRIETAN,
EDO DESMUNTAGARRIETAN EGITEN DIREN SALMENTAK
ARAUTZEKO ORDENANTZA**

1. artikulua: XEDEA ETA APLIKAZIO-EREMUA

- 1) Udal Ordenantza honen xedea da azaroaren 10eko 4/1995 Legeak, jendaurreko ikuskizunak eta jolas jarduerak arautzen dituenak, ezarritako zehaztapenak osatzea Zarauzko udalerrinari dagokionean.
- 2) Bereziki, herriko jaiak edo bestelako kultur ekitaldiak egiten direnean, edota salgaiek izaera hori duten kasuetan, egitura eramangarriak, behin-behinekoak edo desmuntagarriak instalatu edo ustiatzeko lizentziak arautzen dira.
- 3) Ondorengoak bereiziko dira, baina beste forma batzuk ere egon daitezke.
 - a) Herriko jaietan jartzen diren salmenta-postuak (erroskilak, litxarrieriak eta gozokiak, globoak).
 - b) Herriko jaietan ostalaritza gremioak kanpoan jartzen dituen salmahaiak.
 - c) Produktu tipikoen eta artisautzako produktuen salmenta-postuak.
 - d) Jaiak edo kultur ekitaldiak daudenean egiten diren azokak, erakusketak, edo bazkariak (antolaketa beraren menpe dauden egitura edo kaseten zenbatekoa)
 - e) Txosnak.
 - f) Barrakak eta zirkoak.
 - g) Bide eta zona publikoetako musika ekitaldiak eta ikuskizunak.

2. artikulua: ESKAEREN AURKEZPENA

Baimena lortzeko eskaerak Zarauzko Udaleko Erregistro Orokorrean aurkeztuko dira, lehentasunez baimena eskatu nahi den eguna baino hilabete lehenago eta gutxienez 10 egun lehenago. Oro har, eskaeran jarraian adierazten dena jasoaraziko da, jardueraren arabera bereziki erabakitzen diren puntuez gain:

- Eskatzailearen izena eta bi deiturak, edota hala badagokio, ordezkatzeko duenaren izen soziala edo taldea.
- Ospakizuna egiteko edo instalazioa jartzeko arrazoiak, motibazioak edo helburua.
- Jakinarazpenetarako helbidea eta harremanetarako telefonoa.
- NAN, IFK, pasaporte edo egoitza-baimena.
- Salgaien zerrenda edo egingo diren ikuskizun zein jardueren zerrenda.

- Eskatzen den kokalekua eta instalazioek okupatuko duten gune publikoaren azalera (m²).
- Noizko eskatzen den baimena: datak eta ordutegiak

3. artikulua: LIZENTZIA

Jendaurreko ikuskizunak edo jolas jarduerak egiteko, hala nola behin-behineko instalazio edo egiturak jartzeko, aldez aurretik Udalak emandako lizentzia eduki behar da. Bertan, honako hauek zehaztuko dira: instalazioaren titulartasuna eta deskribapena, antolatzailea, kokalekua, baimendutako jarduerak eta indarrean dagoen araudiaren arabera bete beharreko baldintzak.

Jarduera hori ezin izango da inolaz ere egin ondorengo tokietan:

- Etxebizitza nahiz merkataritza-jardueretarako sarbideetan
- Kafetegi eta/edo tabernen parean
- Merkataritza-erakusleihen parean, erakusleihu osoari nahiz zati bati traba eginez

Leku berean egiten diren jardueren arteko distantzia elkarri trabarik ez egiteko bestekoa izango da.

Handik gertu dauden eraikinetara transmititu daitekeen gehieneko zarata maila *Pertsonak Zaratatik eta Bibrazioetatik Babesteko Udal Ordenantzan* (Gipuzkoako Aldizkari Ofiziala 30. zk., 1998ko otsailaren 16koa) dago ezarrita eta honakoa da:

	EGUNEZ (8:00-22:00)	GAUEZ (22:00-08:00)
Logelak eta egongelak	35 dB (A)	28 dB (A)
Ezkaratz-eskailera	40 dB (A)	35 dB (A)
Komunak, pasilloak eta sukaldeak	40 dB (A)	30 dB (A)

Dagozkion neurketak interesatuek eskatuta egingo dira. Etxebizitzetara transmititutako zaraten mailak aurreko taulan adierazitakoak baino handiagoak direla egiaztatzen bada, Udaltzaingoa ahaldunduta egongo da jarduera geldiarazteko.

Dena den, herriko jaietan edo udalerrarentzat interesgarriak diren jardueretan, kasu bakoitzerako berariaz zehaztuko da.

Herritarrentzat edo ondasun higiezinatarako arriskutsuak izan daitezkeen jarduera edo ikuskizunetarako ez da lizentziarik emango.

Antolatzaileak ordainduko ditu autore-eskubideak.

4. artikulua: ASEGURU-POLIZA

Tamaina txikiko egitura eramangarrien kasuan izan ezik -lizentzian hala erabakiz gero

baldintza hau betetzetik salbuetsita geratu baitaitezke- gainerakoetan antolatzaileak edo eskatzaileak egiaztatu egin beharko du aseguru-poliza bat hitzartua duela, instalazio edo jarduera motaren arabera lizentzian erabakiko den zenbatekoaz. Poliza horrek titularren erantzukizun zibila estaliko du, hau da, instalazioen baldintza objektiboen ondorioz edota haien zerbitzupeko langileen lanaren ondorioz bertaratuei eragindako kalteengatik, eta halaber aplikagarri diren arauetan aurreikusitako obligazioak beteko direla ere ziurtatuko du.

Eskatzailearen ohiko jarduerarako poliza bat hitzartuta dagoenean, egiaztatu egin beharko da poliza hartan estalita geratzen dela baimenaren xede den noizbehinkako jarduera osagarriak berekin dakarren arriskua.

Bide eta zona publikoetan egiten diren musika ekitaldiek eta ikuskizunek ez dute baldintza hau bete beharko, ekitaldiaren beraren izaerak bestelakorik aholkatzen ez badu, behintzat.

5. artikulua: FIDANTZA

Antolatzaileak edo lizentzia eskatzaileak fidantza bat eratu beharko du -lizentzian erabakitako zenbatekoaz- araudi honetan ezarritako obligazio hauen betetzeari erantzun ahal izateko: zigorren zenbatekoa ordaintzea, Udalak lagatako materialak ez itzultzea, eta bidean edo ondasun publikoetan eragindako kalteak ordaintzea, etab.

Edozein ez-betetzereengatik fidantza konfiskatzeaz gain, Zarauzko Udalak kalteengatik edozein kalte-ordain kendu ahal izango du fidantzatik. Kalte horien zenbatekoak gordailututako fidantza gainditzen badu, guztia kobratu ahal izateko dagozkion neurriak hartuko dira.

Fidantza itzultzeko derrigorrezkoak izango dira lizentzia ematea proposatu zuen organoaren txostenaz gain, Udaltzaingoaren eta Udal Zerbitzu Teknikoen txostenak, eta horietan zehaztuta agertu beharko da lizentzian ezarritako baldintza guztiak bete egiten direla: musika eta instalazioak ireki eta ixteko ordutegiak, soinu-mailak, barrutiaren garbiketa, baimendu gabeko publizitatea, kartelak eta/edo pankartak jartzea, adin txikikoei alkohola eta/edo tabakoa saltzea... Era berean, lizentziaren xede den jardueraren kontrola egiteko beste txosten tekniko batzuk eskatu ahalko dira.

Bide eta zona publikoetan egindako musika ekitaldiek eta ikuskizunek ez dute fidantzarik jarri beharko beren jarduera garatu ahal izateko, ekitaldi edo ikuskizunaren izaerak bestelakorik aholkatu ezean.

6. artikulua: ORDAINARAZPEN FISKALA

Jarduera edo salmenta nork egiten duen kontuan hartuta, hain zuzen ere, irabazi-asmoa duten enpresak nahiz erakundeak diren ala irabazi-asmorik gabekoak diren

kontuan hartuta, bide publikoa okupatzeagatik dagokion ordenantza fiskalaren arabera zehaztutako ordainarazpenak aplikatuko zaizkie.

7. artikulua: LAN-ARAUDIA, ARAUDI FISKALA ETA GIZARTE-SEGURANTZAKOA BETETZEA

Irabazi-asmoa duten enpresek eta erakundeek ondokoa egiaztatu beharko dute, lizentzia lortu ondoren eta jarduerari hasiera eman baino lehen:

- a) Jarduera Ekonomikoen gaineko Zergari dagozkion epigrafeetan alta emana duela, eta ordainketak egunean dituela.
- b) Eskatzaileak dagokion Gizarte-Segurantzaren erregimenean alta emana duela eta, hala badagokio, eskaeraren xede den jardueran arituko diren langileek ere alta eman dutela.
- c) Horrez gain, erkidegoz kanpoko saltzaileek egiaztatu egin beharko dute badituztela lan-baimena eta egoitza-baimena.

8. artikulua: BAIMENAREN EZAUGARRIAK ETA BALDINTZAK

Baimena pertsonala eta besterenezina izango da. Baimenaren titularraren menpeko langileren batek erabiliz gero, dokumentu bidez egiaztatu beharko da.

Pertsona, talde edo elkarte bakoitzeko ezingo da baimen bat baino gehiago eskatu.

Postuak ezingo dira Udalak adjudikatutako tokitik mugitu.

Instalazioaren ustiapenez arduratzen diren langileak baimenaren titularrak diren talde edo enpresakoak izan beharko dira.

Instalazio motaren arabera, arautegi honetan eta/edo 4/1995 Legean ezarritako baldintzak ere bete egin beharko dira.

9. artikulua: INSTALAZIOEN SEGURTASUNA ETA HIGIENEA

Instalazioek jendearentzat segurtasun, higiene eta erosotasun baldintzak eskaintzen dituztela egiaztatu beharko da espedientean, teknikari eskudun (ingeniari, goi mailako arkitekto edo arkitekto teknikoa) baten ziurtapenaren bidez, batez ere ondokoari dagokionean:

- 1) Egituraren sendotasuna eta instalazioaren funtzionamendua: Egituraren dokumentazio teknikoa aurkeztu beharko da, eta honek Udal Zerbitzu Teknikoen oniritzia izan beharko du.

Ireki aurretik, Udalak izendatutako langileek ikuskapen teknikoa egingo dute eta, beharrezkoa bada, Osasun Publikoko eskualdeko osasun-zerbitzuek ere osasun-ikuskapena egingo dute.

2) Suteen eta bestelako arrisku kolektiboen aurkako prebentzio eta babes neurriak:

- SUAREKIKO ERRESISTENTZIA: Instalazioek eta material sukoiek suaren kontrako tratamendua edukiko dute, eta hau ziurtatzeko suaren kontrako tratamenduaren egiaztagiria aurkeztuko da.
 - Beharrezkotzat joz gero, behar adina eta mota egokiko su-itzalgaiuak jarriko dira.
 - Ahaleginak egingo dira kokalekua ur-hartuneen ondoan egon dadin.
- ERRESISTENTZIA MEKANIKOA: Kasu bakoitzean erabakitzen dena.
- INSTALAZIO ELEKTRIKOAK: Udal teknikari eskudunak edo Udalak izendatutako teknikariak egingo du. Tresna elektriko desberdinen konexioak, berriz, eskatzaileek egingo dituzte, baimendutako instalatzaile elektrikari baten bidez, eta egindako lanak egiaztatzen dituen ziurtagiria aurkeztu beharko dute, betiere Behe Tentsioko Erregelamendu Elektroteknikoak dioena zehatz-mehatz betez. Norbere muntaia elektrikoa behar izanez gero (bai instalazio batzuei argindarra emateko, bai hauen barneko instalazioa egiteko), argindarraren kontratugileari eskatuko zaio baimendutako instalatzaile argiketariak izenpetu eta Eusko Jaurlaritzako Industriako Lurralde Ordezkaritzak izapidetutako instalazio-buletina.

3) Osasungarritasun eta higieneko baldintzak:

3.1.- Janarien manipulazioa duten instalazioak:

Jaietan, azoketan, eta horrelakoetan aldi baterako jartzen diren instalazioetan (txosnak,...) elikagaiak eta/edo edariak manipulatu, prestatu edo saltzen badira, Eusko Jaurlaritzaren Osasun Sailak ezarritako baldintza tekniko-sanitarioak bete beharko dira. Arautegi honekin batera daude baldintza horiek (I. eranskina).

3.2.- Janari manipulaziorik ez duten instalazioak:

Manipulazio txikiko eta osasun arrisku txikiko janaria saltzen utziko zaie, hala nola ogitarteko hotzak, opilak eta betegarririk gabeko pastelak, betiere janari horiek guztiak ontziratuta badaude, eta baita edariak orokorrean ere.

10. artikulua: INSTALAZIO NAHIZ EGITURA ERAMANGARRI, BEHIN-BEHINEKO EDO DESMUNTAGARRIETAN SALTZEKO GAIK ETA BALDINTZAK

Jarduerarako aurreikusten den instalazio motaren arabera erabakiko da zein gai sal daitekeen.

Guztiz debekatuta dago produktu galkorrak merkaturatzea, horiek egoki kontserbatzeko beharrezko diren baldintza tekniko-sanitarioak betetzen ez dituzten postuetan.

Jarduera hastean, osasun-ikuskapena behar duten produktuen saltzaileek janariekin batera eraman beharrezko merkataritza-dokumentuak aurkeztu beharko dituzte, janari horien jatorri baimendua egiaztatzeko. Dokumentu horien ordeztu, antolatzaileak zinpeko aitortpen bat aurkez dezake.

Jarduera hastean, dokumentu bat aurkeztu beharko da eta, bertan, salduko diren janarien zerrenda, janari mota eta horien jatorria zehaztuko dira, eta baita horiei aplikatu beharrezko arautegiek ezarritako baldintzak bete izana ere.

Ez da inoiz ere janaririk jarriko lurlean bertan eta jendaurrean daudenak behar bezala babestuta egongo dira.

Txosnetan, ostalaritzako establezimenduen kanpoan eta behin-behineko instalazioetan erabiliko diren edalontzi eta antzekoak erabilera bakarrezkoak eta biodegradagarriak edota jarduera jakin baterako espresuki egindako edalontzi berrerabilgarriak izango dira, eta antolatzaileak bermatuko du horien higieena.

Guztiz debekatuta dago 18 urtetik beherakoei edari alkoholodunak edota tabakoa saldu edo hornitzea ondoko legeetan ezarritakoa betetz: Eusko Legebiltzarraren 15/1988 Legea, azaroaren 11koa, drogen menpekotasunen arloan aurrea hartu, lagundu eta gizarteratzeari buruzkoa eta 28/2005 Legea, abenduaren 26koa, tabakismoaren kontrako osasun neurriak ematekoa eta tabakoaren salmenta, hornidura, kontsumoa eta publizitatea arautzekoa.

11. artikulua: ALDEZ AURRETIKO IKUSKAPENA

- 1) Instalazioen jarduera hasi eta martxan jarri aurretik, titularrak eta arduradunak behartuta daude kasuan kasu arlo desberdinetan eskudun diren udal teknikarien -edo Udalak izendatutako langile baten- eskutik dagozkion ikuskapen eta kontrol teknikoak izatera.
- 2) Aipatutako baldintzak bete gabe ezin izango dira 1. artikuluan zehaztutako jarduerak eta instalazioak martxan jarri, horrela bermatuko baitira jai-barrutiaren segurtasun, sendotasun, osasun, higieena eta apaindura baldintzak, eta baita ziurtatuko ere instalazio eta jarduera horietatik gertu dauden auzokoek atsedenerako duten eskubidea.

12. artikulua: OSASUN-IKUSKAPENA

Eskualdeko Osasun Publikoko Janari eta Albaitaritza Kontrolerako Zerbitzuek egiaztatu ahal izango dute, bai ofizioz bai alde batek hala eskatuta, osasun izaerako araudia betetzen dela. Erakunde eskudunek edo ikuskatzaileek hala eskatuz gero, pertsona fisiko nahiz juridikoak honako honetara behartuta daude:

- Instalazio, produktu nahiz zerbitzuei buruzko informazio guztia ematera, eta ikuskapena erraztera.
- Ikuskapenaren arlo zehatzarekin lotuta dagoen dokumentazioaren kopiak ematera.
- Ikuskapena errazteko bitartekoak jartzera, inolako eragozpenik jarri gabe.
- Beharrezkoa bada, laginak hartzen uztera.

13. artikulua: HERRIKO JAIETAN EDO UDALERRIARENTZAT INTERESGARRIAK DIREN JARDUERETAN JARTZEN DIREN SALMENTA-POSTU IBILTARIAK

Eskatutako jaietara edo jardueretara dagokien egunerako, edo egunetarako, balioko du baimenak.

Tradiziozko erromeria batean ohikoak diren gaiak salduko dira: erroskilak, litxarrerriak, gozokiak, globoak eta antzekoak. Debekatuta daude bestelako gaiak, eta Udaltzaingoak konfiskatu ahal izango ditu. Salbuespenez eta nahierara, produktu tradizionalak eta jaiarekin nahiz jarduerarekin zerikusia duten produktuak saltzen utziko da. Kasu horietan guztietan, janariak baimendutako establezimenduetakoak izan beharko dira, eta janariekin batera eraman beharreko merkataritza-dokumentuen bidez justifikatu beharko da hala direla; jakiak eurek egiten badituzte, berriz, osasun-erregistroko zenbakia edo dagokion osasun-baimenaren zenbakia erakutsi beharko dute.

Udalak esleituko du baimena, postu mota desberdinen artean banaketa homogenea egiteko irizpideen arabera. Mota bereko postuetarako eskaeraren sarrera-data hartuko da kontuan. Instalazioa egiteko momentuan Udaltzaingoak interesatuari jakinaraziko dio eskatzaile bakoitzari zein toki esleitu zaion, eta hori jakin baino lehen esleipendunak ezingo dira dagokien tokian jarri.

Postuek 5 metroko neurri estandarra izango dute. Eskaeran hala jasoarazten bada, inoiz edo behin postu bikoitzak edo beste neurri batekoak baimendu ahal izango dira.

Zarauzko Udalaritza dagokio “udalerrarentzat interesgarria den jaietara nahiz jardueretara” baimenak emateko erabakitzea.

14. artikulua: OSTALARITZAKO ESTABLEZIMENDUEN KANPOKO SALMAHAIK

San Pelaioko festak, Euskal Jaiak eta auzoetako festak edo bestelako ekitaldiak ospatzen diren zonako establezimenduek eskatu ahal izango dute baimena, aplikagarri zaizkien araudi guztiak betetzen dituztela eta Udalarekin dituzten zerga-betebeharrak egunean daudela egiaztatzen badute, eta segurtasuneko eta larrialdietako zerbitzu publiko guztien irisgarritasuna bermatzen badute, betiere.

Salmahaiek okupatuko duten gunea pribatua izanez gero, orduan jabearen baimena aurkeztu beharko da.

Instalazio hauetan erabiliko diren edalontziak erabilera bakarrekoak eta biodegradagarriak edo berrerabilgarriak izango dira eta antolatzaileak bermatuko du horien higieua.

Establezimenduko zerbitzu higieniko-sanitarioak jendearentzat irekita eta garbi egon beharko dira eta, beharrezkoa izango balitz, garbiketa areagotu egin beharko litzateke.

Erabakitako fidantza jarri beharko dute eta bide publikoa okupatzeagatik dagokion tasa ordaindu beharko dute.

Bide publikoa garbitu beharko dute, erabili aurretik zegoen bezalaxe uzteko.

15. artikulua: ARTISAUTZAKO PRODUKTUEN SALMENTA-POSTUAK

Artea eta artisautza sustatzeko asmoz, artisautzako produktuak saltzeko gune bat egokituko da (Ipar kalea edo Udalak erabakitzen duen besteren bat). Kasu horretan, lurzoru publikoa doan lagako da. Gune horretan dagoen lekuaren arabera erabakiko da zenbat lizentzia eman.

Herriko artisauak sustatze aldera, eskaera eguna baino hiru hilabete lehenagotik Zarauzko udalerrian bizi direla egiaztatzen duten artistek eta artisauek eskatu ahal izango dute baimena. Leku arazorik ez dagoen bitartean, baldintza hori bete gabe eman ahal izango dira lizentziak. Leku arazorik gertatuz gero, orduan Zarauzko artistek izango dute izendatutako tokia okupatzeko lehentasuna.

Salgaiak artistek eurek egindako arte-lanak eta artisau-lanak baino ez dira izango. Berariaz debekatzen da produktuak berriz saltzea. Bestelako produktuak saltzea lizentzia baliogabetzeko besteko arrazoia izango da.

Baimendu gabeko lehengai eta/edo produktu landuekin egindako eta behar bezala identifikatu gabeko (etiketak, fakturak edo beste agiri batzuk) artisau-lanak merkaturatzea berariaz debekatuta dago. Halaber, dagokion titulaziorik edo osasun-erakunde eskudunak aitortutako baimenik gabe osasunarentzat arriskugarri izan daitezkeen jarduerak egitea berariaz debekatuta dago.

16. artikulua: AZOKAK, ERAKUSKETAK ETA ANTZEKOAK (ANTOLAKETA BERAREN MENPE DAUDEN KASETEN ZENBATEKOA)

Izaera orokorreko baldintzez gainera, eskaerarekin batera honako hau aurkeztu beharko dute: postuen zerrenda, erakutsi edo merkaturatuko diren produktu motak, eta jarduera egoki garatzeko lurzoru publikoa okupatzeko zenbat metro karratu eskatzen den.

17. artikulua: TXOSNAK

1.- ESKAERAK ETA ESLEIPENA

- Beren jarduera Zarauzko udalerrian garatzen duten eta irabazi-asmorik ez duten kultur, kirol zein gizarte izaerako erakundeek, taldeek edo elkarteek eskatu ahal izango dute txosnak jartzeko baimena, legalki eratuta egonez gero eta dagokion IFK edukiz gero. Salbuespenez, baldintza horiek betetzen ez dituzten erakundeak onartu ahal izango dira, betiere zeregin sozial bat betetzen dutela ulertzen bada.
- Talde edo elkarte eskatzaileek beren jardueraren urteko programa eta dagokion aurrekontua eduki beharko dituzte.
- Txosna-barrutiaren kokalekuaren eta txosnen tamainaren arabera erabakiko da gehienez ere zenbat txosna jarri. Leku arazoagatik zenbatekoa mugatuz gero, aldeztatik Udalak baimena ematea erabakitako eskatzaileen artean jai desberdinetarako banaketa homogeen bat egin beharko da urtean zehar. Txosna-barrutian aniztasuna bermatzeko, ahaleginak egingo dira txosna-taldea osatzen duten arlo desberdinak (kultura, kirola eta gizartea) aldi bakoitzean egoki ordezkatzuta egon daitezzen.
- Talde edo erakunde bakoitzak urtearen lehen hiruhilekoan aurkeztu ahal izango du urtean zehar txosnaren bat jartzeko duen asmoa.
- Proposamen horien iraupena urte naturalekoa izango da, eta urtero berriztatuko da udalerriko kultura, kirol eta gizarte mailako talde guztiei deialdia eginda.
- Udalak erabakiko du, Kultura Batzordeak hala proposatuta, aurkeztutako eskabideen esleipena eta gai honen inguruko beste edozein kontu.

2.- INSTALAZIO ETA FUNTZIONAMENDU BALDINTZAK

- Baldintza teknikoak, segurtasunekoak eta higieniko-sanitarioak, araudi honetan eta 4/1995 Legean oro har deskribatutakoak izango dira.
- Lizentzian zehaztuko dira txosnak irekitzeko tokia, egunak eta ordutegia.

18. artikulua: BARRAKAK ETA ZIRKOAK

Izaera orokorreko baldintzez gainera, eskaerarekin batera ondokoa aurkeztu beharko dute: proposatutako atrakzioak (ahal dela argazkia edo beste edozein irudi), horien neurriak eta martxan jartzeko zenbat leku publiko behar duten. Etxebizitza-karabanak zirkoko barrutian kokatuko dira. Gainerako kasuetan kokapenak udal zerbitzuen oniritzia eduki beharko du.

Izaera orokorreko araudiak dienez gain, barrakek eta zirkoek instalazio proiektua aurkeztu beharko dute, teknikari eskudun batek sinatua eta dagokion Elkargoak ikus- onetsia.

19. artikulua: MUSIKA EKITALDIAK ETA FORMATU TXIKIKO IKUSKIZUNAK BIDE ETA GUNE PUBLIKOETAN

Izaera orokorreko baldintzez gain, honakoak bete beharko dira:

- 1) Bide publikoan musika jotzeko eta formatu txikiko ikuskizunak egiteko, Udalaren lizentzia beharrezkoa izango da. Hau prekarioan emango da eta herrian dauden musikagile eta artista kopuruaren, erabiltzen dituzten musika tresnen eta urtaroaren arabera nahierara emango da. Lizentziaren titularrak aldean eraman beharko du lizentzia eta Udaltzainen eskura egongo da.

Aldi berean jarduera berdinetarako gehienez zenbat lizentzia emango den Kultura Batzordeak erabakiko du eta, jarduerak baimenduko dira baldin eta araudi erregulatzaile honetan ezarritako baldintzak betetzen badituzte; eskaerak egin diren ordena zehatzaren arabera emango dira lizentziak. Eskaera gehiagorik egonez gero, baimena ukatu egingo zaie.

Lizentzia gehienera 3 egunetarako emango da. Horiek igaro eta gero berriro eskatu beharko da, eta Udaltzaingoaren esku geratuko da berritzea ala ez, ikuskizun motaren, jokabidearen eta udalerrarentzat interesgarriak izan daitezkeen gainerako gorabeheren arabera.

Eskaeran jarduera non egin nahi den zehaztuko da. Udaltzaingoak lekuak esleituko ditu, lehentasunezkoak direnak eskatzaileen artean txandakatzeko moduan

- 2) Jardueran lizentziarik eskatu gabe arituz gero, Udaltzainek jardulari eskatuko diote Udaltzaingora joateko lizentzia eskatzera, baldintza hori bete ezean ezin baita kale-ikuskitzunean jardun.

3) Jarduera ondoko lekuetan egingo da:

- Kale Nagusian, Torre Luzearen aurrean
- Musika plazan
- Lege Zaharren enparantzan
- Itsasertzeko pasealekuan
- Barren plazan
- Munoan
- Eska daitezkeen beste leku batzuetan (auzoetako festak...)

4) Musikaren ordutegia honako hau izango da:

Udan: goizeko 11:00etatik 15:00etara eta arratsalde 19:00tik 23:00etara
(ekainaren 15etik irailaren 15era)

Neguan: goizeko 11:00etatik 15:00etara eta arratsalde 19:00tik 22:00etara
(irailaren 16tik ekainaren 14ra).

Nolanahi ere, Udalaren ustez udalerrientzat interesgarriak diren jaiak ospatzen diren egunetan edo beste ekitaldi berezi batzuetan, kasu bakoitzerako ordutegia zehaztuko da, eta hori izango da salbuespen bakarra.

Etxebizitzak gertu dituzten plaza edo kaleetan egiten diren musika emanaldiek, antzerkiek edo beste edozein ikuskizunek, baldin soinua anplifikatzeko sistemak erabiltzen badituzte, antolatzailearen kontura soinua mugatzeko tresna bat eduki beharko dute, lizentzian ezarritako soinu-muga ez gainditzeko eta, gainera, askora jota, atal honetan adierazitako orduetan bukatu beharko dute, bizilagunei deskantsatzen uzteko.

- 5) Jardueraren erantzuleek soinu-materiala baino ezingo dute saldu (kaseteak, diskoak, disko trinkoak, etab.), eta horiek ere diharduten musikarien edo taldeen grabazioak baldin badira.
- 6) Era berean, Udaltzaingoak emanaldiak geldiarazteko ahalmena izango du, konturatzen bada arau hauetakoren bat ez dela betetzen, edo egiaztatzen bada jarduera horiek debekatuta dauden beste jarduera batzuk estaltzeko erabiltzen direla, esate baterako eskean ibiltzeko, edo eskean ibiltzeak musika jotzeak baino lehentasun handiagoa badu.
- 7) Dena den, Alkateak, Kultura Departamentuak edo Udaltzaingoak ematen dituzten aginduak bete beharko dira.

20. artikulua: INSTALAZIOAK IREKI ETA IXTEKO ORDUTEGIAK

Kasu bakoitzean erabakiko da ireki eta ixteko ordutegia, instalazio motaren arabera. Oinarriztat hartuko dira bai jarduerari dagokion sektorearentzat arauz ezarrita dauden ordutegiak, aldi berean beste ekitaldi edo jaialdi batzuk dauden etab.

21. artikulua: ZAINZA ETA SEGURITASUNEKO ZERBITZUAK

Horiek jartzea exijituko da jendetza biltzea aurreikusten denean. Berariaz salbuesten ez bada, eskatzaileen kontura izango dira instalazioen zaintza eta segurtasuneko gastuak.

22. artikulua: BIDE PUBLIKOAREN GARBIKETA ETA ZAINZA

Hondakin eta zaborrak Udalak horretarako jartzen dituen ontzietan bota beharko dira.

Ostalaritza gremiokoek kanpoan jartzen dituzten salmahaiek, txosnek eta etengabe hondakinak (ontziak, zorroak...) sortzen dituzten beste instalazio guztiek zakarrontziak jarri beharko dituzte instalazioaren alde bietan eta hauek aldian-aldian hustu, honela inguruko bide publikoa garbi egon dadin.

Garbiketa eta zabor bilketa zerbitzuez gain, antolatzaileak jai-barrutia jendearentzat behar bezain garbi eta apain edukitzeaz arduratuko dira, eta eguna amaitu ondoren instalazioaren barrualdea eta kanpoko ingurunea garbituko dituzte.

Eskatzaileek bide publikoa eta hiri-altzariak zaindu beharko dituzte, eta bere jardueraren ondorioz sor daitezkeen kalteak ordaindu beharko dituzte.

Arduradunek beren ibilgailuak jai-barrutitik kanpora utzi beharko dituzte, horretarako Udaltzaingoak adierazitako lekuan.

Guztiz debekatuta dago helburu horretarako ez den lekuetan materiala biltzea.

23. artikulua: MEGAFONIA

Araudi honen xede diren instalazioetan megafonia-sistemak edo musika-aparatuak jartzeko ahalmena lizentzian eman beharko da. Barruti batean instalazio bat baino gehiago badago, ekipo bakar bat jarri ahalko da denentzat, eta bertan bozgorailuen bolumen-mugatzaile bat jarri beharko da, erabakitzen diren dezibelioetara zigitatuta.

24. artikulua: PUBLIZITATEA

Euskaraz egin beharko da, iragarleek aukeratzen dituzten hizkuntzez gainera. Zuzen idatziko dela bermatzeko, inprimatu edo jarri baino lehen Udaletxean aurkeztu beharko da testu-zirriborroa.

Zarauzko kaleetan horretara zuzendutako tokietan baino ez da jarriko. Taula mugikorrek jartzeko baimena ere emango da, eta azoka edo ekitaldia amaitzean kendu egin beharko dira.

25. artikulua: ZEHAPEN-ARAUBIDEA

Udalak zehatzeko duen ahalmena ondokoetan xedatutakoak arautuko du: Herri Administrazioen Araubide Juridikoaren eta Administrazio Prozedura Erkideari buruzko azaroaren 26ko 30/1992 Legearen IX titulua eta lege hori garatzeko araudia, eta 2/1998 Legea, otsailaren 20koa, Euskal Autonomia Erkidegoko Herri Administrazioen zigortzeko ahalmenari buruzkoa.

Legebiltzarrak onartutako 4/1995 Legea, jendaurreko ikuskizunei eta jolas jardueri buruzkoa aplikatu behar zaien jardueri dagokienez, eta hala badagokio, lege horretan zehapen-prozedurarako aurreikusten diren arauak aplikatu beharko dira.

26. artikulua: ARAU-HAUSTEAK

Jendaurreko ikuskizunen eta jolas jardueren alorreko arau-hauste administratiboak azaroaren 10eko 4/1995 Legeak, jendaurreko ikuskizunei eta jolas jardueri buruzkoak (EHAA 230, 1995-12-1), xedatutakoaren arabera sailkatuko dira.

27. artikulua: ZIGORRAK

Jendaurreko ikuskizunen eta jolas jardueren alorreko zigorrak azaroaren 10eko 4/1995 Legeak, jendaurreko ikuskizunei eta jolas jardueri buruzkoak (EHAA 230, 1995-12-1), kategoria bakoitzerako xedatutakoak izango dira.

28. artikulua: ZIGORRAK ZEHAZTEKO MODUA

Jendaurreko ikuskizunen eta jolas jardueren alorreko zigorrak zehazteko modua azaroaren 10eko 4/1995 Legeak, jendaurreko ikuskizunei eta jolas jardueri buruzkoak (EHAA 230, 1995-12-1), xedatutakoak izango dira.

29. artikulua: ERANTZULEAK

Jendaurreko ikuskizunen eta jolas jardueren alorreko zigorren erantzuleak azaroaren 10eko 4/1995 Legeak, jendaurreko ikuskizunei eta jolas jardueri buruzkoak (EHAA 230, 1995-12-1), adierazitakoak izango dira.

30. artikulua: ALDI BATERAKO XEDAPENA

Indargabetuta geratzen da bide eta zona publikoetako musika eta ikuskizunak arautzen zituen bandoa.

AZKEN XEDAPEN INDARGABETZAILEA

Udalaren arau edo xedapenak indargabetuta geratuko dira Ordenantza honetan xedatutakoaren kontrakoa esaten duenari dagokionean,, eta berariaz honako hauek:

- Ekitaldi publikoak, herriko jaiak edo beste ekitaldi publikoak direla eta instalazio edo beste egitura mugikor, behin-behineko edo desmontagarrietan egiten diren ekitaldi publikoak, jolas jarduerak eta salmenta arautzeko udal ordenantza (Gipuzkoako Aldizkari Ofiziala 99. zenbakia, 1997ko maiatzaren 28koa, eta 151. zenbakia, 2001eko abuztuaren 8koa).
- Alkatetzaren bandoa, kale-musika eta ikuskizunei buruzkoa, 1996ko apirilaren 15koa.
- Alkatetzaren bandoa, bide eta zona publikoetako musika eta ikuskizunei buruzkoa, 2005eko uztailaren 8koa.

EGINBIDEA.- Jasoarazteko Ordenantza hau, hasierako izaeraz, 2009ko apirilaren 29an egindako osoko bilkuran onartu zuela Udalbatzarrak.

Zarautzen, 2009ko apirilaren 30a
Idazkaria

EGINBIDEA.- Jasoarazteko Ordenantza hau, behin betiko izaeraz, 2009ko uztailaren 29an egindako osoko bilkuran onartu zuela Udalbatzarrak.

Zarautzen, 2009ko uztailaren 30a
Idazkaria

EGINBIDEA.- Jasoarazteko, Ordenantza honen testu osoa 2009ko abuztuaren 17ko Gipuzkoako Aldizkari Ofizialean (153 zk.) argitaratu zela, eta 2009ko irailaren 4an sartu dela indarrean.

Zarautzen, 2009ko irailaren 4a
Idazkaria

1. ERANSKINA

BEHIN-BEHINEKO INSTALAZIOEK (TXOSNEK...) BETE BEHAR DITUZTEN GUTXIENEO BALDINTZA TEKNIKO-SANITARIOAK JAIK, AZOKAK... DIRELA-ETA, ELIKAGAIK ETA/EDO EDARIAK MANEIATU, PRESTATU EDO SALTZEN DITUZTENEAN

A.- INSTALAZIO, MATERIAL ETA TRESNERIAREN BALDINTZAK

- Beren eginkizun espezifikoak ez direnetatik egoki berezita eta isolatuta egongo dira.
- Zikinkeria nahiz kutsaduratik edo osasunari kalte egin diezaiokeen beste edozein arrazoitatik tarte egokira kokatuko dira.
- Instalazioak jartzen diren lekuetako zoruaren eraikuntzako ezaugarriek garbiketa eta desinfekzio egokia ahalbidetuko dute.
- Instalazioek behar bezalako sabaia izango dute, eguraldi txarretik babestuta egongo dira eta maneiatze eta/edo biltegitratze guneetara jendearen sarrera eragozteko moduan jarrita.
- Elikagaiak maneiatzen diren gainazalak edo elikagaiak ukitu ditzaketenak lauak, ez xurgatzaileak, eta garbitzen nahiz desinfektatzen errazak diren materialez egindakoak izango dira.
- Instalazio eta tresneriaren garbiketarako nahiz langileak garbitzeko beharrezkoa den beste edateko ur edukiko dute. Hustubideak estolderiara lotuko dira.
- Aireztapena izango dute, eta beharrezkoa bada baita ke eta gas erauzgailua ere,
- Hozkailuak izango dituzte, edukiera nahikoa izanik eta egoki banaturik lehengaiak eta produktu prestatuak isolatuta biltzeko moduan.
- Instalazio egokiak izango dituzte (apalak, armairuak...) produktu ez galkorrak, tresneria, garbigarriak eta desinfektatzaileak biltzeko, betiere egin behar den lan kopuruaren arabera.
- Hondakinak biltzeko itxigailu hermetikodun estalkia duten ontziak edukiko dituzte. Horien hustuketa behar den bestetan egin beharko da, hondakinak pilatu ez daitezen.
- Establezimendu eta instalazioen kanpoaldean ontziak edukiko dira erabilera bakarreko platerak, edalontziak eta mota guztietako ontziak botatzeko poltsa eta guzti.

B.- INSTALAZIO ETA TRESNERIAREN HIGIENEARI BURUZ

- Instalazio eta laneko tresna guztiak erabat garbi egon beharko dira denbora guztian.
- Garbitzeko sistema guztietan egin beharrekoa: garbiketa baimendutako garbigarri batekin egin eta ondoren ur askorekin xaboia kendu.
- Behar besteko edukiera duen ontzi-garbigailurik eduki ezean, edalontziak, platerak, mahai-tresnak edo beste mota batzuetako edukiontzi guztiak erabilera bakarrekoak izango dira, erabili eta botatzekoak.

C.- LANGILEEZ

- Elikagaiak maneiatzen dituzten langileek jantzi egokia, osoa eta eskusiboa erabiliko dute. Beti garbi-garbi eduki beharko dute.
- Denbora guztian higiepe pertsonal ezin hobea izan beharko dute.

D.- LEHENGAI EI ETA PRESTATUTAKO PRODUKTUEI BURUZ

- Baimenduta eta behar bezala identifikatuta (etiketak, fakturak edo beste dokumentazio bat) dauden lehengai ez eta prestatutako produktuez hornituko dira.
- Elikagaiak direnak eta ez direnak ez dira elkarrekin biltegitratuko.
- Elikagai gordinek eta prestatutako produktuek ez dute elkar ukitu behar prestatzen, biltegitratzen nahiz kontserbatzen diren bitartean.
- Elikagaiak ezingo dira lurzorua ukitzen egon biltegitratzeko, maneiatzeko edo sukaldean prestatzeko inongo prozesutan.
- Jendaurrean jarritako lehengaiak eta/edo prestatutako produktuak jendearengandik behar bezala bereizita egon beharko dira, beira-arasa, ontzi edo estalkien bidez.

JARDUERA PROTOKOLOA

Udaltzaingoa arduratuko da lizentzia bakoitzean ezartzen diren baldintzak betearazteaz eta baldintzen betetzeari buruzko txosten xehatua egingo du. Txostenean ondorengo alderdiak bete ote diren zehaztuko da gutxienez:

- Instalazio kopurua (postuak, txosnak...)
- Instalazioak zenbat egunetan egongo diren kokatuta (irekitzeko eta muntatzeko/desmuntatzeko baimena)
- Instalazioen kokapena
- Lizentzian ezarritako jarduera ireki eta ixteko ordutegiak
- Lizentzian ezarritako soinu-mailak betetzen ote diren (horien neurketak)
- Edozein ez-betetzere arduradunak identifikatzea
- Motordun ibilgailuekin zirkulatzeko edo horiek aparkatzeko debekua betetzen ote den, horretarako ez diren zonetan (hala badagokio)
- Horren inguruan jasotako kexak, kexa horien kopia batekin batera

Ondorio guztietarako, baimenean zehaztutako talde eta pertsonak izango dira erantzuleak

Bulego Teknikoa arduratuko da lizentzia bakoitzean ezartzen diren baldintzak betearazteaz eta baldintzen betetzeari buruzko txosten xehatua egingo du. Txostenean ondorengo alderdiak bete ote diren zehaztuko da gutxienez:

- Egitura edo elementuari buruzko dokumentazio teknikoa egiaztatzea
- Lizentziaren xede den egitura, objektuak edo material-bilketa kanpoaldean egotea
- Ingurua errespetatu eta garbi-garbi mantentzea, batez ere berdeguneak eta hango landareak
- Hondakinak (zaborra, papera, beira etab.) inguruetan instalatutako edukiontzietan botatzen direla egiaztatzea (hala badagokio).
- Motordun ibilgailuekin zirkulatzeko edo horiek aparkatzeko debekua betetzen ote den, horretarako ez diren zonetan (hala badagokio)
- Lizentzian ezarritako taldeko segurtasun eta arriskuen prebentziorako baldintzak betetzen ote diren egiaztatzea (hala badagokio)
- Udalaren sareetara konexioak egitea baimenik gabe (hala badagokio)
- Lizentziaren xede diren barrualdeko instalazioak (elektrizitatea, ura...) baimendutako

instalatzaileek egiten dituztela egiaztatzea (txosnen kasuan)

- Obrarik ez egitea, hiri-altzariak lekuz aldatzea edo kentzea baimenik gabe (hala badagokio)

Kultura Departamentua arduratuko da lizentzia bakoitzean ezartzen diren baldintza guztiak betearazteaz eta baldintzen betetzeari buruzko txosten xehatua egingo du. Txosten horretan, Udaltzaingoak eta Bulego Teknikoak adierazitako alderdiez gain, gutxienez ondorengo alderdien betetzeari buruzko informazioa agertuko da (lizentzian eskatu egiten badira):

- Tasaren ordainketa
- Fidantza jartzea
- Erantzukizun zibileko aseguru-poliza kontratatzea
- Lizentzian ezarritako soinu-mailak betetzea (soinu-mugatzailea jartzea)